



中國古典文學基本叢書



中華書局

劉克莊集箋校

第七册

中國古典文學基本叢書

# 劉克莊集箋校

第七冊

〔宋〕劉克莊 著  
辛更儒 校注

中華書局

# 劉克莊集箋校卷五五

按：本卷內制，起淳祐十一年（一二五一）辛亥，迄景定二年（一二六一）辛酉，兩當內制時所撰。

## 內制

### 答詔

賜京湖制置使李曾伯辭免除寶文閣學士

職任依舊不允詔<sub>(二)</sub>

敕曾伯：自頃邊臣不善牧御，鉅鎮堅壘，棄如贅疣。朕每飲食，意未嘗不在襄樊也。卿顯閫幾何時，而二城復歸於職方氏，厥功茂焉。冠奎閣之直，陟統府之名，賞不踰時之

義也。忽披來奏，方且謙謙。然推勞吏士，懇避恩渥，過矣，過矣。

朕惟晉自永嘉，河南丘墟。用一祖逖，所至能翦荆棘立官府，心甚慕之。今二城殘敝，未如河南之甚。增守備以隄防後患，合智勇以堅凝前功，安集新民，拊循鬥士，使關可以戰，閉戶可以守，朕之所圖於卿也。先小遜，後遠略，豈卿素志？匪朕樂聞。

【箋注】

二題，李曾伯，宋史卷四三理宗紀三：「淳祐十年三月庚寅，李曾伯徽猷閣學士、京湖安撫制置使知江陵府。」同書卷四二〇李曾伯傳：「進徽猷閣學士、京湖安撫制置使知江陵府。兼湖廣總領。兼京湖屯田使，進龍圖閣學士。」按：李曾伯進寶文閣學士，在其除制置使之後，進龍圖閣學士之前，應即淳祐十一年間。

賜新除權刑部尚書程公許辭免兼侍讀不允詔

敕公許：朕召諸賢而未至，嘉一老之來歸。觀辰告遠猷之忠，見歲寒後凋之操，朝野想望其風采，搢紳流傳其奏篇。曳履之班雖高，細旃之業未究。終始於學，將求商宗

之多聞；直諫如卿，不曰孔門之三益？俾之勸誦，胡乃執謙？漢廷思見賈生，既訪治安之策；齊人莫如孟子，必陳仁義之言。其即欽承，勿煩巽避。所請宜不允。

【箋注】

二題，程公許，宋史卷四一五程公許傳：「程公許字季與，一字希穎，叙州宣化人。……嘉定四年舉進士。……清之再相，公許屏居湖州者四年，再提舉玉隆觀，差知婺州。未上，帝欲召爲文字官，清之奏：「已令守婺。」帝曰：「朕欲其來。」乃授權刑部尚書，屢辭弗獲。」

賜寶制蔡範辭免除刑部侍郎不允詔<sub>二</sub>

敕蔡範：朕歷數先皇之侍從，興懷爾考之忠良。恨不同時，幸其有後。頃由邇列，詳式左馮。願借寇君之留，去思雖切；不見賈生之久，注思已深。人物眇然，公等在？孰復奏篇而嘉歎，俾還禁橐以論思。出有黃霸龔遂之風，民庸籍甚；入居蘇公呂侯之任，人命繫焉。朕念必行，卿辭毋費。

【箋注】

(二)題，蔡範，宋史及地方志無傳，直齋書錄解題卷八：「黃巖志十卷，知縣永嘉蔡範蓮甫撰，嘉定甲申。」清葛萬里別號錄卷一謂蔡範字遵甫，應是。弘治溫州府志卷一一：「蔡幼學，字行之，瑞安人。……子禽、節、範。禽字達甫，爲樞密都承旨。範字遵甫，編宋通志五百卷，守衢，化行山洞，卓有殊績。終於吏部侍郎，風力峻整，直己不阿，爲時名侍從云。」蔡範以寶謨閣待制除刑部侍郎，未見書冊記載。

賜觀文殿大學士游似三上奏札辭免再任宮觀不允詔(二)

敕游似：詔諭已詳，懇祈愈確。昔彥博垂九齡而得謝，豈限引年之文？杜衍僅一請而獲從，殊匪貪賢之意。尚欲遣使者安車之禮，詎可無廩人繼粟之恩？萬鍾何加，豈容心於求富；三命而俯，無乃過於爲恭？夫知止知足，固老氏之名言；可速可久，亦孔門之中道。况大臣之辭受，繫列辟之觀瞻。卿無執謙，朕不反汗。

【箋注】

(二)題，游似，宋史卷四一七游似傳：「游似字景仁，利路提點刑獄仲鴻之子，嘉定十四年進士……

淳祐四年提舉萬壽觀兼侍讀，仍奉朝請。授知樞密院事兼參知政事，進爵郡公。五年拜右丞相兼樞密使，上章乞歸田里，帝不許。七年特授觀文殿大學士禮泉觀使兼侍讀，進爵國公，十一年轉兩官致仕薨。〔同書卷四三理宗紀三：「淳祐十一年二月庚子，游似乞致仕，詔依舊觀文殿大學士，進二秩。」右詔當作於是年正月間。

### 賜太傅左丞相兼樞密使魏國公鄭清之再上奏辭

#### 免侄次申與見次監司恩命不允詔〔二〕

敕清之：朕以丞相避勢遠嫌，虽貴極公台，而宗戚鮮少；又皆常調平進，與寒門素族無異。僅有一兄子，本由科第發身，白首州縣，異於所謂恩澤侯者。畀節起家，良不爲過。丞相方且考據古今，頓首固辭，章却復上。負薪牛具恩之薄也，朱輪華轂侈之過也。朕之報功無已，丞相之訓儉有素。奈何援是，以爲比乎？渙命必行，巽亟姑止。

#### 【箋注】

〔二〕題，鄭清之之侄次申，據寶慶四明志卷一〇，次申爲嘉定十年吳潛榜進士，與清之同爲四明樓昉

之門下弟子，見延祐四明志卷五。另據宋史卷四三理宗紀三，淳祐十一年鄭清之正在左丞相兼樞密使任上。

### 賜觀文殿學士陳韓上表掛冠不允詔<sup>(二)</sup>

敕陳韓：卿養氣至剛，得孟氏之學；鞠躬盡力，有孔明之風。頃煩畫繡之行鄉，乃欲角巾而還第。州里化其廉遜之行，朝野仰其高潔之名。宣室前席之咨，方渴聞其至論；神武掛冠之奏，忽求踐於昔言。夫辭兩社之位，何節之虧？却萬鐘之祿，何滿之有？方叔之猷尚壯，晉公之年未衰。卿猶股肱，亦既冠二三執政之列；朕所體貌，其可拘七十謝事之文？益堅在王室之心，毋作遁生民之計。

#### 【箋注】

二題，陳韓，字子華，福州長樂人，父孔碩。宋史卷四一九有傳。按：陳韓於淳祐七年四月自同知樞密院事除知樞密院事，湖南安撫大使兼知潭州。此後即奉祠家居。十一年上表掛冠事史冊未載。其卒於景定二年七月庚午，見宋季三朝政要卷三。清張英文端集卷二八有觀內府藏宋



「理宗不允陳韡辭官手札真蹟詩云：「秋壑朝堂秉政初，士林風節更何如？當時猶有辭榮者，屢降南朝鳳紙書。」

### 賜禮部侍郎兼給事中兼侍讀張磻乞祠不允詔

敕張磻：卿多士之宗，法從之老。秦誓所謂黃髮詢謀，漢人所謂白首魁壘之臣也。朝廷有遺忘，賴卿陪輔；旃厦有顧問，待卿啓沃。格心之學，造膝之言，有人所未知者。昔朕禋祀，卿以耆年，奉璋左右，略親湯液，隨奏藥喜。第甘泉之頌，前宣室之問。朕方有意，奈何欲引年乎？今號召天下，賢雋未至；舊人如卿，幾何屈指？其體眷注，勉爲朕留。

#### 【箋注】

（二）題，張磻，宋史卷四二〇張磻傳：「張磻字渭老，福州人，嘉定四年進士。……遷國子祭酒，時暫兼權禮部侍郎，尋爲真，兼國史編修實錄檢討。」

## 賜資政殿大學生正奉大夫提領戶部財用兼知臨安府趙與篋

### 乞歸田里不允詔<sup>(二)</sup>

敕與篋：前卿厭劇思閒，歸志浩然，朕詩以留之。居無幾何，復有汶上之興，豈猶未孚朕意耶？自頃計省京尹，每難其才。卿疊二組踰十年，使國力未甚屈，糴價不敢上，其事亦豈易哉？求全之論，幾於太過，卿疏殆有所激而云。自昔任事之臣，獲久其職，究於用者鮮矣。朕於卿終始如一，無可問之迹鉅細必從，無不售之言，舍朕將安之乎？夫顧衆口之毀譽，而欲潔一身之去就，疏遠者然也，豈所望於同姓之卿歟？

#### 【箋注】

(二)題，與篋，據咸淳臨安志卷四九，趙與篋，處州人，淳祐元年四月以中大夫中書門下省檢正諸房公事除司農卿兼知臨安府，八年七月六日除資政殿學士仍與執政恩例，依舊知兼提領戶部財用，至淳祐十二年正月二十八日除觀文殿學士知紹興府，知臨安十一年。右詔，當作於淳祐十一年十一月。

## 賜太傅左丞相兼樞密使魏國公鄭清之再上奏乞

### 歸田里不允詔<sup>(二)</sup>

敕清之：朕顛任元台，久虛次輔。君臣相得，庶幾同聲氣之求；機務至繁，寧免獨賢勞之歎？忽覽封章之疊上，冀還政柄而勇歸。首指寒暑相代之言，歷陳古昔薦賢之事。居常樂善，尤喜聞樂克之爲；孰不吝權，乃欲惟國僑之聽？如卿卓識，自昔罕儔。今朝無虎豹在山之威，邊有蚌鷓相持之勢。方且寄安危於元老，奈何潔去就於一身？孟子謂予豈舍王？詎宜出畫；洛誥曰公無困我，未可明農。尚體眷注，勿存形迹。

#### 【箋注】

(二)題，鄭清之丐歸，宋史卷四三理宗紀三：「淳祐十一年十一月甲辰，鄭清之乞解機政，詔依前太傅、保寧軍節度使充醴泉觀使，封齊國公，仍奉朝請。」

## 擬進左丞相鄭清之丐歸田里不允褒詔

朕所以留丞相者至矣，來疏猶以耄耋爲辭。昔在元祐，彥博以師臣輔政，蘇軾稱之曰：「其綜理庶務，酬酢事物，雖精練少年有不及；貫穿古今，治聞彊記，雖專門名家有不逮。」朕觀丞相，摹畫天下事，與所上朝廷章奏，蓋今彥博也。夫鎮物資重望，經國須老謀，朕方仰成，卿勿言去。

## 賜安德軍節度使開府儀同三司充萬壽觀

### 使趙與權乞休致不允詔<sup>①</sup>

敕與權：卿望重宗英，位崇使弼。前抗陳情之疏，暫爲遷祔之行。孔氏合葬於防，何其久也？季子來歸於魯，跂予望之。忽覽奏函，力求還笏。素有爲蒼黔之志，又非掛衣冠之年。何所嫌疑，遽茲勇決？豈朕用才之弗盡，致卿陳誼之甚高。夫功名貴始終之全，忠孝無仕止之異。國家近屬，寧不馳魏牟存闕之心？將相重臣，未可作羲之誓墓

之語。盍踐予寧之約，願聞人覲之期。

【校】

①「權」，原作「權」，據宋史本傳改。

【箋注】

(二)題，趙與權乞休致，宋史卷四一三趙與權傳：「趙與權字悅道，燕懿王八世孫，嘉定七年進士。……史嵩之將復入相，而人言不已。……時相忌之，尋授安德軍節度使、開府儀同三司、萬壽觀使。……拜少傅卒。」

賜參知政事吳潛再上奏乞解罷機政不允詔(二)

敕吳潛：卿以重望毗大政，朕所深眷，人無間言。游覽封章，以慨時病。懼物論爲辭，求解機務，有大臣之風矣。朕政以時病爲憂，早朝晏罷，思與卿等圖之。卿而引去，則所謂助明時行善事者，卿當屬之誰耶？賈誼有言：「醫能治之，而上不使。」至今識者

爲漢文恨。卿任崇輔弼，朕方以卿爲活國之鍼艾，救時之盧扁也。其安厥位，勿費乎辭。

【箋注】

（二）題，吳潛解機政，宋史卷四三 理宗紀三：「淳祐十一年三月戊寅，吳潛參知政事。……閏十月癸酉，吳潛五疏乞罷機政，不允。……十一月甲寅，吳潛爲右丞相。」

擬進參知政事吳潛乞解機政不允褒詔

朕累詔留行，卿疏可以止矣，復援錢若水勇退爲言。朕惟若水，適值平世，得遂其志。今爲何時？中外喁喁望治，位參廊廟，以身殉國可也，豈得但以退爲高乎？卿既立初節，又欲保晚節，朕謂體羣臣，孰若禮大臣？其悉至懷，益肩忠報。

賜同知樞密院事徐清叟再上奏乞解機政不允詔（二）

敕清叟：詔墨猶濕，奏函復上。勇退未已，爲之慙然。朕於士大夫之在列者，未嘗

輒聽其去，况二三大臣乎？卿知時事之艱，宜念股肱之竭力；任本兵之重，盍彊精神而折衝。豈必以潔身辭位爲高耶？矧素著直諫，數聞忠鯁。夫直言國之華也，忠社稷之鎮也，朕方倚卿爲重，又何危殆之有？

【箋注】

〔一〕題，徐清叟，宋史卷四三理宗紀三：「淳祐十一年三月戊寅，徐清叟同知樞密院事。……十一月乙卯，以徐清叟參知政事兼同知樞密院事。」按：徐清叟乞解機政，應在吳潛乞解機政之後。

擬進同知樞密院事徐清叟乞解機政不允褒詔

方今歲功告成，邊烽不聳，政朝廷力行好事之時。而二三大臣，方且更迭求退，深所未喻也。卿之忠直，朕所照知。決去無名，留行有詔。若魏證所云「君都顯號，身荷美名」者，朕之所圖於卿也。豈必以二疏、兩龔自擬乎？其勿重陳，益思叶濟，所請宜不允。

## 賜寶章閣學士提舉江州太平興國宮陸德輿辭免

### 除寶謨閣學士知泉州不允詔<sup>二</sup>

敕德輿：卿昔以天官夕拜，代官勸讀遺近矣。去而帥閩，七聚之人安之。屬困讒舌，棲遲衡泌。朕既采公論，雪前誣，而焚中山之篋矣，溫陵調守，徒得君重。謂已佩二千石印綬，需函來上，若重於南轅者。夫民之情僞，卿知之矣。卿之條教，民習之矣。亟其叱馭，爲朕一行。噫，自先朝至今，牧是邦者不知其幾，惟襄惟十朋，惟思惟德秀，其民戶而祝之，朕之望於卿者如此。

#### 【箋注】

〔二〕題，陸德輿知泉州，至元嘉禾志卷一五：「嘉定十年吳潛榜，陸德輿，童科，尚書。」同書卷一三：

「宋陸德輿字載之，號魯齋，寧宗嘉定間由童科第進士，弱冠有文，歷兩制，知貢舉，官至吏部尚書。從祖垓，從父鏞，相繼世科，垓仕至秘書。」南宋館閣續錄卷八秘書郎淳祐以後：「陸德輿字載之，貫嘉興府，治春秋，童子舉，丁丑吳榜。七年八月，以知南康軍在任除，十一月除著作郎。」



按：民國泉州府志卷二六淳祐十一年知泉州無陸德興，蓋其固辭不已，未嘗到任。

## 賜直秘閣主管鴻禧觀時暫主奉祭祀趙與澤辭免除福州

### 觀察使提舉佑神觀嗣秀王不允詔

敕與澤：安僖王國之近屬，宜百世祀。爾於次宜襲爵，前議刻印而雅尚冲挹，若不欲就封者，姑令主祭。朕每人孝宗廟，未嘗不惕然也。子曰：「必也正名乎？」茲授爾廉車，胙爾茅土，典故則然，非朕創始。及披來奏，乃以季父伯氏當封，輒夭爲辭。夫夭壽定數也，繼續大義也，朕聞天道，福善而益謙。爾行己居官，強於爲善。辭榮避寵，退然好謙。曰貴曰壽，必然之理。嗣安僖者，非爾而誰？

#### 【箋注】

(一) 題，趙與澤辭嗣秀王，趙與澤，宋史無傳，據明夏良勝中庸衍義卷五，謂察訪趙與澤爲宋末死義之士。然宋史卷四六度宗紀：「咸淳七年冬十月丙申，少傅、嗣秀王與澤薨，詔贈少師，追封臨海郡王。」則非死節者甚明。弘治徽州府志卷四，載趙與澤以朝奉郎，寶祐五年正月知州事，六